



Jumat, 26 April 2024

Ogen: Lukas 1:35-38



Ngendesken Diri Man Tuhan



Sekalok supir angkot nabrak anak sekolah si sangana erdalan ras temanna mulih sekolah. Sedar supir e maka ia enggo nabrak, e maka iangkatna anak sekolah ndai itaruhkenna ku rumah sakit. Kenca si e endeskenna dirina man polisi. Iturikenna kejadiin situhuna. I bas ngendesken diri e ia enggo siap kune ukumen kai pe si jadi man bana. Lanai ipertahankenna sura-surana tapi patuh man aturen/hukum si berlaku.

Bage me Maria ngendesken dirina man Tuhan, ngatakensa sura-sura Tuhan si jadi bas dirina, lanai sura-surana. Pasti lit resiko i bas ia ngendesken diri man Tuhan, tapi ia enggo siap ngalakensa. Bagi semalna i bas aturen kalak Jahudi, adi singuda-nguda tereteh natang tuah lenga erjabu e seri ras erlua-lua. Kalak si bage arus iukum alu ibenteri salu batu. Adi ia enggo ertunangen, tunangenna ras keluargana kerina enggo jadi imbangna. Bapa nandena pe banci lanai ngaloken ia sabap ia enggo erbahan aib man keluarga. Percakapen Malaikat mpetetap ukur Maria. Sura-sura Tuhan make Maria jadi perkakasNa nehken si mehuli man doni enda. Ieteh Maria maka labo ia sisada ndalanisa, lit Kesah Si Badia si nampati kune kai gia pagi si jadi. Kesah si Badia e erkuasa i bas diri Maria, e maka tetapkak ukurna. Lanai aru ate entah bera bera pusuh lako ngendesken diri man Tuhan jadi perkakasNa.

Uga nge kesiapen dirinta ngatakensa jadilah sura-sura Tuhan i bas diringku. Kuendesken diringku jadi perkakasNa. Biasana adi perkakas, reh rusurna ipake reh mehulina. Umpama cangkul i juma reh rusurna ipake reh telapna. Sekin/pisau adi reh rusurna ipake reh jilena. Aturena reh rusurna kita ndahiken dahin Tuhan, geluhta reh sikapna, pengerananta reh ulina, pendahinta reh raturna, jabunta reh mehulina. Sabap Kesah si Badia ikut erdahin mpekena-kenasa kerinana. Labo lit si la mehuli adi pembabai Kesah si Badia. Sabap si i bas Bapa nari mehuli kerina. Tetaplah ukur kerina Moria ngendesken diri man Tuhan jadi perkakasNa, gelah malerlah pasu-pasu Tuhan arah kita man enterem jelma. Kita pe malem ateta.